

如岑法師 輯

# 思歸集

佛陀教育基金會 印贈



如岑法師輯

# 思歸集

佛陀教育基



普爲出資及禮謝受持  
輾轉流通者回向偈曰

願以此功德  
消除宿現業  
增長諸福慧  
圓成勝善根  
所有刀兵劫  
及與饑饉等  
悉皆盡滅除  
人各習禮讓  
讚誦受持人  
輾轉流通者  
現眷咸安樂  
先亡獲超昇  
風雨常調順  
人民悉康寧  
法界諸含識  
同證無上道

佛曆二五〇年／西元二〇〇六年二月

## 思 歸 集

發行人：林國營

出版者：財團法人佛陀教育基金會

地址：100 台北市杭州南路一段五十五號十一樓

網址：<http://www.budaedu.org>

E-mail: [budaedu@budaedu.org](mailto:budaedu@budaedu.org)

電話：(02) 2395-1198 傳真：(02) 2391-1345

劃撥戶名：佛陀教育基金會 劃撥帳號：07694979

銀行名稱：台北富邦銀行東門分行（請於電匯或轉帳後告知本會用途）

帳號：五八〇二一〇一九三三一三

本會經書免費結緣之請取方式如下：

(一) 親臨佛陀教育基金會二樓講堂

(二) 利用傳真：(02) 2396-5959

(三) 發送 E-mail: [domestic@budaedu.org](mailto:domestic@budaedu.org)

(四) 寫信指名：佛陀教育基金會法寶流通股

(五) 撥打電話：(02) 2395-1198 分機：一一、一二或一三

為提高服務效率，請您嚴謹考量，慎選所需經書，儘量利用前面四種方式請取，若用(二)至(四)項，請詳寫經書名稱、冊數及收件人姓名、地址、電話、郵遞區號，以減少本會之處理時間；大量申請，請註明用途，儘量少用電話，以避免姓名、地址等文字上書寫之錯誤，若用電話，請長話短說，讓本會能順暢服務更多之大眾。

◎本會網站，請經音檔、文字檔。內涵豐富，請多利用

本會經書，歡迎翻印（請勿增刪），贈送流通，功德無量  
行政院新聞局出版事業登記證局版臺業字第三八六九號

恭印二〇〇本

CH860-5760

## 重印思歸集序

嘗聞世稱佛法利生，惟鮮有言及出要者。知出要矣，又復忽於淨土之門，幸逢知識，誘掖介之，欣欣焉相率而趨之矣。涉其津見，夫浩瀚無際，又生畏縮焉，終至逡巡以退。所謂魚子菴摩羅花，豈不信歟？或有進退未決，徘徊無所，及聞淨僅三經，又易其簡，復起鼓進，循其途入漸深，始悟三經不過淨法之三綱，綱若舉，目全張，則帝網群珠，有重重無盡者矣。古德云：千經萬論，處處指歸。若期諸事理一心，捨夫群經論議，惡能明其法，而行其實哉。境造乎此，不免又有仰彌高，鑽彌堅之歎，欲止不能，欲進莫由，其不困躓者幾希。西蜀高僧，如岑上人者，承靈巖之衣鉢，深得念佛三昧。憫末法鈍根，不可大受。乃選經論念佛旨趣，及歷代祖師法言，彙為一編，曰：思歸。

集。納大千於一指，藏須彌於芥子，更從而鉤玄提要，抉摘竊微，能手一冊，何異淹通淨藏，學既無畏而復縮退，是真不知有生死之可畏也已。此集悲切權巧，堪謂蓮海疾舟，然賭卞和之璞，能識其為美玉者，衡鑑教下，似又不多見也。古閩陳居士煌琳，靈巖之高足，篤於淨學，一讀而深契之，適其王考妣百週冥紀，思追劬勞，曰：報恩之大，莫若述先志也。先考妣崇佛，好濟眾。今之世與心，溺俱深矣，能濟之者，其為佛法乎？若畏而難之，有淨法在，仍畏其繁，有斯集焉。故重刊廣布之，俾眾生登此疾舟，有不出要者乎？斯舉也，為宏道歟，為利生歟，或專為孝思歟，抑為岑上人之知音歟？予惑不能辨，問諸達人。達人笑曰：一舉而眾德備，既備矣，不亦善乎？與其徧計而執其偏，曷若權實而融其圓哉？予豁然投筆，拜其言。

中華民國六十年辛亥端陽後三日 李炳南敬序

## 思歸集發刊序

淨土法門。其大無外。如天普覆。似地均擎。上之則等覺菩薩。不能超出其外。下之則逆惡罪人。亦可預入其中。誠可謂三世諸佛之總持法門。一代時教之特別妙道也。但以法門大而攝機溥。用力少而得效速。致稍通宗教者。皆藐視之。謂為愚夫愚婦之修持法門。而不知佛力自力之大小難易。不可以語言文字形容也。以一切法門。依戒定慧力。修到業盡情空地位。方有了生死分。業盡情空。豈易言哉。斷見惑如斷四千里流。況思惑乎。縱令見地高深。以煩惱未斷。仍舊輪迴。再一受生。退者萬有十千。進者億少三四。自力之不足恃。敢矜己智。而不隨順如來誓願攝受之道乎。修淨土法門者。但具

真信切願。志誠懇切。如子憶母而念。其平素所作所為。不與佛法世誼相悖。則臨命終時。蒙佛接引。往生西方。縱絲毫惑業未斷。帶業往生者。其所得尚超過業盡情空之阿羅漢上。以種性不同故。況已斷者。又何待言。以佛力不可思議。法力不可思議。眾生心力不可思議。合此佛法二不可思議之力。俾自心之力。得以圓顯。（此自力與不仗佛法力之自力迴別。）固與專仗自力者。奚啻恆河沙數之天淵懸殊也。是知此之法門。不可以一切普通法門之道理論。以是特別法門故也。余嘗有聯云。法門廣大。普被三根。因茲九界同歸。十方共讚。佛願洪深。不遺一物。故得千經併闡。萬論均宣。華嚴普賢行願品。盡華藏世界海法身大士。十住。十行。十迴向。十地。等覺。四十一位。均一致進行。依普賢菩薩教。以十大願王功。

德。求生西方。以期圓滿佛果。彼矜己智而藐淨土者。為超過此諸菩薩之上。為是喪心病狂。求升反墜。弄巧成拙也。宏揚淨土經書。多難勝數。如岑大師。錄其佛菩薩祖師。及近世各學人言論。（近世知識稱為學人者。以前有佛菩薩祖師故。切勿疑訝。）名思歸集。祈光作序。光少不努力。老無所能。但將五十九年所信之義書之。以塞其責。聊表普願同倫。同生西方之愚誠。至於大智慧人之譏誚唾罵。所不計也。爰為之歌曰。應當發願願往生。客路溪山任彼戀。自是不歸歸便得。故鄉風月有誰爭。思歸諸君。祈各注意。

民國二十八年己卯冬至前三日 七十九歲粥飯僧釋印光謹撰



題思歸集

截句十首

- ① 萬論千經語義繁。纂歸一卷便流觀。  
分明說與還家樂。好作豐碑指路看。
- ② 佛言祖語輯精賅。淨土詩成正可懷。  
漫道有家歸未得。鄉心無盡似西齋。
- ③ 背父飄流五十年。現成家業在西天。  
思量金臂遙垂處。忍使如來望眼穿。
- ④ 業盡情空未易幾。法王方便妙難思。  
而今識得還鄉路。驀直趨歸七寶池。
- ⑤ 娑婆樂少苦尤多。欲斷生因可若何。  
浪子還家真樂事。原來慈父是彌陀。
- ⑥ 佛念眾生如憶子。眾生背父久離鄉。

莫教逃逝長違遠。功德池中水正香。

⑦ 輪迴萬劫與千生。早備資糧信願行。

十萬億程原在即。未應邊地住疑城。

⑧ 迷途未遠莫遲回。準擬蓮邦歸去來。

到得家園團聚處。藕花香裏坐金臺。

⑨ 七重寶樹燦光華。九品香臺四色花。

都攝六根成淨念。始知安養是吾家。

⑩ 法聽樓閣玲瓏處。身在毫光照耀中。

水鳥風林都唱佛。無邊樂事是蓮宗。

書雲黃覺 三十年正月上元日

思歸集卷一

印光法師鑑定 思歸子釋如岑敬輯

皈命發願偈

皈命西方佛法僧。願乞慈悲冥加被。

令依是集修學者。悉得往生證不退。

本師釋迦牟尼佛。梵語釋迦牟尼。此云能仁寂滅。釋迦是姓。牟尼是名。佛。譯覺者。當中國周昭王二十六年。四月初八日。示生於中印度。迦毘羅國王宮中。為太子名悉達。父王名淨飯。母名摩耶。從右脅生。十九出家。三十成道。說法五十年。住世八十載。滅度於拘尸那城。娑羅雙樹間。時周穆王五十三年。二月十五日也。詳如別傳。

佛說阿彌陀經云。從是西方。過十萬億佛土。有世界名曰極樂。其土有佛號阿彌陀。今現在說法。又云。彼土何故名為極樂。其國眾生。無有眾苦。但受諸樂。故名極樂。又云。彼佛何故號阿彌陀。彼佛光明無量。照十

方國無所障礙。是故號為阿彌陀。彼佛壽命。及其人民。無量無邊。阿僧祇劫。故名阿彌陀。又云。眾生生者。皆是阿鞞跋致。其中多有一生補處。其數甚多。非是算數所能知之。但可以無量無邊阿僧祇說。又云。眾生聞者。應當發願。願生彼國。所以者何。得與如是諸上善人。俱會一處。又云。若有善男子。善女人。聞說阿彌陀佛。執持名號。若一日。若二日。若三日。若四日。若五日。若六日。若七日。一心不亂。其人臨命終時。阿彌陀佛與諸聖眾。現在其前。是人終時。心不顛倒。即得往生阿彌陀佛。極樂國土。又云。汝等眾生。當信是稱讚。不可思議功德。一切諸佛所護念經。○十六觀經云。欲生彼國者。當修三福。一者孝養父母。奉事師長。慈心不殺。修十善業。二者受持三皈。具足眾戒。不犯威儀。三者發菩提心。深信因果。讀誦大乘。勸進行者。如此三事。名為淨業。○大集經云。端坐繫念。專心想彼阿彌陀佛。如是相好。如是威儀。如是大眾。如是說法。如是繫

念心心相續次第不亂……是人必覩阿彌陀佛……譬如世間若男若女遠行他國於睡夢中見本居家時實不知為晝為夜而亦不知為內為外是人爾時所有眼根牆壁石山終不能障乃至幽冥黑暗亦不為礙……積念薰修久觀明利故終得覩彼阿彌陀佛也。○寶積經云。爾時彌勒菩薩白佛言。世尊。如佛所說阿彌陀佛。極樂世界。功德利益。若有眾生發十種心。一心專念向於阿彌陀佛。是人命終當得往生彼佛世界。世尊。何等名為發十種心。由是心故當得往生彼佛世界。佛告彌勒菩薩言。彌勒。如是十心。非諸凡愚不善丈夫之所能發。何等為十。一者於諸眾生起於大慈。無損害心。二者於諸眾生起於大悲。無逼惱心。三者於佛正法。不惜生命。樂守護心。四者於一切法。發生勝忍。無執著心。五者不貪利養恭敬。尊重淨意樂心。六者求佛種智。於一切時。無忘失心。七者於諸眾生。尊重恭敬。無下劣心。八者不著世論。於菩提分。

生決定心。九者種諸善根。無有雜染清淨之心。十者於諸如來。捨離諸相。起隨念心。彌勒。是名菩薩發十種心。由是心故。當得往生。阿彌陀佛。極樂世界。彌勒。若人於此十種心中。隨成一心。樂欲往生。彼佛世界。若不得生。無有是處。

導師阿彌陀佛 梵語阿彌陀。此云無量壽。又云無量光。即西方極樂世界之教主。按鼓音王經。過去劫中有妙喜國。王號憍尸迦。時有佛名世自在王。憍尸迦投佛出家。號曰法藏。又無量壽經云。法藏比丘。於世自在王佛所。發無上菩提心。又發四十八願。每願皆云。若不爾者。誓不成佛。時大地震動。天雨妙華。空中讚言。決定成佛。

佛說無量壽經。四十八願之第十八願云。設我得佛。十方眾生。至心信樂。欲生我國。乃至十念。若不生者。不取正覺。唯除五逆。誹謗正法。第十九願云。設我得佛。十方眾生。發菩提心。修諸功德。至心發願。欲生我國。

臨壽終時。假令不與大眾圍繞。現其人前者。不取正覺。第二十願云。設我得佛。十方眾生。聞我名號。繫念我國。植眾德本。至心迴向。欲生我國。不果遂者。不取正覺。第三願云。設我得佛。國中人天。不悉具足真金色者。不取正覺。第十六願云。設我得佛。國中人天。乃至聞有不善名者。不取正覺。第二十一願云。設我得佛。國中人天。不悉成滿三十二大人相者。不取正覺。

### 觀世音菩薩

梵語阿那婆婁吉低輪。此云觀世音。按悲華經。往昔寶藏佛時。阿彌陀佛為輪王。菩薩為第一太子。名不眴。對佛發宏誓願已。蒙佛更名觀世音。并授以遍出一切功德山王佛之記。現在極樂世界。輔佛宏化。後補彌陀之位。時轉極樂名一切珍寶所成就世界。其他因行果德。及本迹應化。詳如法華。楞嚴。大悲授記等經。

大悲心陀羅尼經云。稱我本師阿彌陀佛。常須供養。專稱名號。得無量

福滅無量罪。命終往生阿彌陀佛國。如來授手。摩頂告言。汝莫恐怖。來生我國。○觀世音菩薩授記經云。發阿耨多羅三藐三菩提心。願生我國。皆見安樂世界。阿彌陀佛。菩薩聲聞。既見是已。歡喜踴躍。唱如是言。南無阿彌陀如來。應供。正徧知。此時眾中八萬四千眾生。皆發阿耨多羅三藐三菩提心。及種善根。願生彼國。○十一面觀自在經云。以淨信心。殷重憶念作意。現世得十種利益。復得四種功德。一者臨命終時。得見如來。二者不生惡趣。三者不非命終。四者從此世沒。得生極樂國土。大勢至菩薩。梵語摩訶那鉢。此云大勢至。按悲華經。往昔寶藏佛時。阿彌陀佛為輪王。菩薩為第二太子。名尼摩。對佛發宏誓願已。蒙佛更名得大勢。并授以善住珍寶山王佛之記。現在極樂世界。位居第二補處。成佛次於觀世音後。其世界時劫佛事等。與觀世音同。楞嚴經載其所說之念佛法門。最為精要。凡修淨業者。俱宜遵行。



楞嚴經云。我憶往昔。恆河沙劫。有佛出世。名無量光。十二如來。相繼一劫。其最後佛。名超日月光。彼佛教我。念佛三昧。譬如有人。一專為憶。一人專忘。如是二人。若逢不逢。或見非見。二人相憶。二意念深。如是乃至。從生至生。同於形影。不相乖異。十方如來。憐念眾生。如母憶子。若子逃逝。雖憶何為。子若憶母。如母憶時。母子歷生。不相違遠。若眾生心。憶佛念佛。現前當來。必定見佛。去佛不遠。不假方便。自得心開。如染香人。身有香氣。此則名曰。香光莊嚴。我本因地。以念佛心。入無生忍。今於此界。攝念佛人。歸於淨土。佛問圓通。我無選擇。都攝六根。淨念相繼。得三摩地。斯為第一。

文殊師利菩薩 或云曼殊室利。此云妙德。亦云妙吉祥。按悲華經。寶藏佛時。阿彌陀佛為輪王。菩薩為第三太子。名王眾。對佛發宏誓願已。蒙佛更名文殊師利。并授記於未來南方清淨無垢寶真世界。